

LA USC DI LADINS – VENERDI' 15 GIUGNO 2012

Cumpededa

2

Plu ladins y tudësc

N pitl aumënt per i ladins y i di tudësc, n pitl smendramënt dla grupa taliana. Chësc ie l resultat dla detlarazions de grupa de rujeneda pra la Cumpededa dla jënt 2011.

Plu ladins y tudësc

N pitl aumënt de 0,16 percënt di ladins, n aumënt de 0,26 percënt di tudësc y n pitl smendramënt dla grupa taliana: chësc ie l resultat dla detlarazions de grupa de rujeneda pra la Cumpededa dla jënt 2011. Chësc resultat cumporta l proporz tl Südtirol per i prosimi diesc ani

Cumpededa dla jënt - Dan prejenté la zifres à l president dla Provinzia Luis Durnwalder ai 12 de juni metù a cuer la mpurtanza dla detlarazions de grupa de rujeneda: „Nosc model de autonomia ie fat su sun la partezipazion ala vita publica da pert de duta trëi la grupes de rujeneda.“ La fundamënta ie l proporz etnich, che vën a se l dé dala detlarazions de grupa de rujeneda, damandedes uni diesc ani. „Chësta detlarazions nes desferenziëia da d'atra mendranzes ulache l ne vën nia fat de tel cumpededes y la grandëza dla mendranzes vën mé sciazeda,“ à spiegà Durnwalder. Te Südtirol iela autramënter. Tlo iel sën la zifres nueves danman, che mostra su la cumposizion dla populazion aldò de grupa de rujeneda. L Istitut provinziel de statistica ASTAT à cumpedà ora 453.272 detlarazions, la zedules che ne vel nia (4.934) y la blances (435) ne n'ie ne ie nia states tan trupes. Permez al 2001 iel stat deplù detlarazions y manco che ne vel nia.

La detlarazions dl 2011 ie states la primes che ie unides dates ju anonimamënter, zënza conseguënzes sun la situazion persunela, ma mé per gaujes de statistica. „A chësta maniera ons n cheder plu senzier dla grupes de

rujeneda, che per fertuna ne à nia purtà de gran mudazions permez a dan diesc ani,“ à dit l president dla Provinzia.

De ndut iel stat 20.548 persones che se à detlarà ladines o che se sënt daujin ala grupa ladina. 314.604 persones se à detlarà tudësc, 118.120 talianes. Metan chësta cumpëides n relazion, féjel ora 4,53% ladins, 69,41 tudësc y 26,06 taliani. A chësta maniera vëniet a se l dé mé de pitla mudazions permez ala cumpededa dan diesc ani. I ladins ie cresciui de 0,16% i tudësc de 0,26% y la perzentuela di taliani ie jita ju de 0,41%.

La grupa de rujeneda tudëscia à la maiuranza te 103 sun 116 chemuns de Südtirol. Te cin' chemuns ie la grupa taliana de maiuranza (Bulsan 73,80%, Leifers 71,50%, Branzoll 62,01%, Salurn 61,85% y Pfatten 61,50%). La grupa de rujeneda ladina ie ti chemuns ladins resteda feter unfat sterscia. L majer aumënt iel stat te Sëlva ulache la grupa ladina ie jita su dl 1,90% arjunjan l 89,74%. A Urtijëi iel stat n aumënt de 1,87% ruvan a 84,19. A Corvara ie la proporzion dla grupa ladina smendreda de 1,30%, arjunjan mo for l 89,70%. Nsci nce a Mareo ulache la grupa ladina à perdù 1,30% ruvan a 92,09%. (ufize stampa provinziel de Südtirol)

Detlarazions de grupa de rujeneda ladina

	2011	2001	desferënzia
Pruporz			
ladins	4,53 %	4,37 %	+ 0,16
tudësc	69,41 %	69,15 %	+ 0,26
taliani	26,06 %	26,47 %	- 0,41
	100 %	99,99 %	
Zifres assolutes			
ladins	20.548	18.736	+ 1.812
tudësc	314.604	296.461	+ 18.143
taliani	118.120	113.494	+ 4.626
De ndut	453.272	428.691	+ 24.581
Chemuns	2011	2001	desferënzia
Sëlva	89,74	87,84	+ 1,90
Urtijëi	84,19	82,32	+ 1,87
Badia	94,07	93,43	+ 0,64
Ciastel	15,37	14,74	+ 0,63
S. Cristina	91,40	91,20	+ 0,20
La Val	97,66	97,67	- 0,01
S. Martin	96,71	97,27	- 0,56
Mareo	92,09	93,30	- 1,21
Corvara	89,70	91,00	- 1,30